



伯大先生像贊

哈佛大學漢和
圖書館珍藏印

所友者天下之英傑所嗜者聖賢之學問命與時違超
然肥遯載瞻遺像山輝玉韞子孫孫子弓裘益振噫不
惟見先生之所遺抑亦可以見先生之所蘊也耶

諸暨王鈺題

貞素先生像贊

讀聖賢之書由聖賢之道所樂者天不易者操藉吟咏
以陶情託林泉以寄傲仁里耆英名鄉大老薰其德者
則薄者敦挹其風者則澆者淳遺像斯在生氣猶存庸

揭其芳敢告後人

南齋魏驥題

心如秋月貌若春陽其儀不忒厥行孔臧望重儒林名
譽載揚家不絕乎縉紳之交子不替乎詩書之場噫誠
可謂先哲之餘裔後學之模範也與

同邑殷旦題

德茂而貌恭學醇而行篤其貞如松其潔如玉內明道
心外稱儒服儀刑千載高風拔俗

同邑俞廷輔題

冠儒冠服儒服年彌高行彌篤規矩家庭表儀士族凜
凜高風綿綿芳躅

江右黃宗載題

貌古而氣清神和而志甯養林泉之高擷詩書之英守
乎貞素享乎壽齡此所爲有道之士豈但擅處士之名
也耶

粵東陳連題

公齋先生像贊

其貌肅而恭其質粹而美讀聖賢之書味聖賢之旨太

青山仁氏家苑 卷七
史既重而字之其益顧名而思義物不拾乎道遺諒其
肯乎苟取所不欠者德學之兩全所不足者祿壽之未
備吁顏子以天而得名原壤以老而見毀若先生之爲
人雖不壽而何媿

臨川章孟孚題

丹壑先生像贊

其貌清而癯其儀肅而舒其學究六經之蘊奧其德爲
吾黨之師儒講道之餘遊心化初長松曲澗孤雲太虛
既自得而有適諒逍遙其何如仰嗟先生兮又何必振

翮於寥廓而出乎皇都也歟

臨川章孟孚題

蔚乎其容浩乎其氣所篤者詩書所敦者道誼文循大
方之制作行昭君子之操履不佞不求無忤無愧是宜
規範其族屬是宜矜式其閭里奈之何生聖明之世乃
甘淡泊而不沾一試而至於長逝也耶

南齋魏驥題

介菴先生暨配湯太孺人像贊

心古人心服今人服所薄者浮華所尚者敦篤勤耕稼

以作生涯謹詩禮以大宗族無忤無愧知止知足既有
田園享田園之時豐時熟亦有子孫樂子孫之如蘭如
玉噫自非素有所積則曷能享多壽多福之如是耶
名門之裔故家之配既溫而柔亦和而粹事良人以恭
謹教子孫以道義噫斯其不忝德日以懋家日以裕壽
日以臻福日以備者耶

南齋魏驥題

士信處士像贊

繫唯此翁貌肅而恭生今之世存古之風夸言不於出

口實行自著於躬其克家也勤儉自力其事親也愛敬
是崇謹譜乘而不泯乎世德重邱隴而不忘乎祖宗時
享祀以寓睦族之意修街衢以普濟人之功跡其所爲
所致皆不務於外而發於中驗諸今而絕少方諸古而
可同噫其誠不忝乎任長者之後以垂孝義於無窮抑
有以受錫慶於天致壽祉之並隆也歟

同邑何舜賓題

宗陸先生像贊

生積善之故家爲名鄉之大老肅乎其氣溫乎其貌享

子孫之奉安田園之樂動也自如靜也自若仁以存其
心義以制其事不佞不求無忤無愧年愈高而德愈謹
德愈謹而行愈修高士期其為侶列僊期其為儔噫斯
其致人孰不仰其永臻康甯壽孰不底於廣成籛鏗而
止以同於消搖於太清也耶

南齋魏驥題

時年九十有八

積善希德星荀陳之賢真逸接聖世巢由之武是宜享
有眉壽而承純祐也心齋室虛而白生素履樂天而安
士示儀範於後人同聲實於前古

斯像曩吏部尚書魏文靖公贊之至矣距今餘十稔
而達尊童顏勝前且多壽徵賢嗣樂親獲引年天慶
也命工再繪之余特贊贊云

同邑張輅題并識

藏軒先生像贊

居今之世慕古之人矻矻乎詩書是親懇懇乎禮義是
循授徒講業韋布終身不違命以求貴惟樂道以甘貧
要知不失為故家之令器清朝之隱淪斯宜其年登稀
古而愈老精神其壽祉之將來尚莫測而無垠

同邑何舜賓題

惟昂處士暨配張太孺人贊

蕭山舊家鄉稱任氏昔曰長者迪德行義名重當時澤
延後裔有美雲初惟昂其字質尚樸厚行敦孝弟其治
家也則勤儉是崇其世家也則耕讀是藝遭太平之時
無衣食之累況有嗣人亦克繼志登古稀之年乘觀化
之理備全福於躬由德善所致噫若翁者庶幾不忝任
氏之子孫而衆人之所鮮儷也歟

貞靜其性敬慎其德婦道既全母儀無忒志不悅乎羅
綺力恆務乎蠶績助內勤劬致家充碩樂蔗境以康甯
享甘旨於晨夕由是而觀則其心優游自如精神內固
將來之遐壽無窮未可以歲月計者也

同邑何舜賓題

清容肅肅和氣溫溫詩書是尚孝友是敦惟安恬而自
適遠寵辱而弗聞有田有業有子有孫衣冠整飭無忝
名門噫其生也雖未能見用於當世亦足以垂裕於後
昆也耶

同邑張玘題

茂才任冰崖先生贊

先生吾契友也先生之生可謂無負於吾友先生之死可謂無負於冥冥處今之世慕古之人早馳譽於學校晚休息於儒林憫友朋之親老而甘讓廩祿念先世之積德而恪慎終身教子孫以詩禮克敦篤乎彝倫佩仁服義動履遵循年高德劭允矣天民是宜與吾儕寄情詩酒以笑傲預鄉飲而延之為大賓不特丕式乎閭里而實無忝乎鄉評

同邑何舜賓題

拙菴先生暨配周太孺人像贊

食以力其學也植政於家其樹也德日獵前書心貯遺則援今古談之亶亶較得失數之歷歷是以叢譽聲於鄉閭起恭敬於巷陌人謂之聰自號以拙處乎其羣超乎其列冬嶺孤松秋江皓月柔不墮行肅克振威一舉一止是適是宜長幼尊卑但見其可則可象卒莫見其或愆或違者矣噫今之敬姜不與孺人而更與誰也耶

會稽陳哲題

勤和處士像贊

標格之清愈彼魁梧悃悞之誠副此貞固良善以爲身
貴積義以爲家富厥心旣臧復何外慕蓋翠竹之筠亦
幽谷之蘭惟其勁潔少汚而芳馨獨吐是謂名鄉大賓
而衣冠翹楚又嘗得賢配以益其資惜早夢白炊而過
作故逮景值以掩蔽乃歷膺乎福祐噫人云已矣儼然
伉儷有像宜起敬者如喬岳之快哉也

同邑陳殷題

終義耆士暨配

太孺人像贊

鴻雁于飛冥冥之表和聲雝雝君子是好時三十餘爰
失其侶感彼令儀鼓盆自處年及耄耄厥聲赫赫延之
泮宮載歌嘉客慨今僊逝並緇德容載登拜啓仰止高
風

同邑黃瓊題

鄉大賓樸菴任公暨配金孺人像贊

心休體豫言溫氣和動靜中所恃者端正規矩內所厭
者偏頗樂擊壤於盛世縱考槃於高歌入鄉耆燕集之
社酌大賓旨酒之犧履幾九帙鬢也雙皤一官錫老帶

蕭山任氏家苑 卷七
博冠我噫舉鄉求如翁之德之壽之享恩榮於晚景者
屈指無多

邑人魏夔題

粹毓名門于歸望族所順性天以敦姻睦聞其事育之
賢知其宜家之淑相夫子以振宗逮中季而獲福噫令
宜有終方將榮養而弗祿茲母儀在圖其貞而著閨幃
之芳馥者歟

眷晚生錢穀拜書

登仕郎鳳橋任公暨配單太孺人像贊

和粹寬容柔嘉易直尚行敦倫履坦蹈吉溫溫恭人休
休彥碩披之春風親之冬日學藝成均官叅巖邑驥絆
於鹽鸞棲於棘宓賤協孚仇香允匹撫字心勞清勤守
職口碑頌仁擬之以佛憲臺礪潔獎之以檄藐爾浮榮
超然自適玉嶺攜筇蕩波泛鷁作善貽謀自天祐德玉
階吐秀雲霄奮翼表表鄉評煒煒仕籍

眷晚生錢穀拜題

懿彼孺人溫柔惠順桃夭起詠作配名門相夫教子內
政修飭夫貴子賢宗黨作式

孺人馴德淑行自幼出於天性及笄而歸任氏爲鳳
橋任先生配任固鉅族也孺人孝慈勤儉承上撫下
內外順治鳳橋學成行修貢於大廷拔於銓曹兩判
劇縣綽有政聲其亦有賴於內助焉余與鳳橋親情
友義相會相接每樂道之惜其享年不永亦命也已
其子斯德余姪女夫也奉父命持此求題因撫其槩
爲之贊云

眷晚生盛瀧題并識

任全夫先生暨配盛孺人像贊

人謂先生未享遐壽先生之壽立德不朽動履周詳色
言無苟厥考林泉承顏左右厥子科名義方啓佑懿行
當年芳名身後達人代興福源罔究彼年所之多歷者
果孰短而孰久

世傳偕老未知偕德孺人之德與夫並立婉懿天成貞
靜維則夫志孝親視膳朝夕夫志友妹佐奩畢力內外
肅雍早夜兢惕庭闈無間閭里稱嘖彼老而無述者又
孰得而孰失

同邑單有學題

始吾先生暨配支太孺人像贊

躬之積兮宏充貌之晬兮濫恭奮予翮兮秋風善翔集
兮雍雍山琅琊兮頽宮邑蓬萊兮撫封名鬱起兮穹窿
邁歸來兮桂叢挾兩雛兮苦攻手讐校兮異同用則誦
兮若通家則約兮若豐世波靡兮既東孰砥柱兮流中
將百世兮景崇矧親炙兮高踪悵晤對兮無從徒瞻仰
兮遺容

越白彤管載之女史匪伊良配亦有賢母孰其兼之惟
支孺人奕奕名族適歸於任爲配伊何晨機夜軸夫子
蕭然忘情饘粥爲母伊何寒素自敦嚴師益友列坐盈
門謝政而歸曷娛夫子山齋竹莊肴核精理伏臘歲時
麟趾振振介爾眉壽稱彼兕觥天若俟之輦服象章誰
其似之既壽且康厥起之豐在其厚施清風肅然欽此
淑儀

同邑來斯行題

學有淵源行無粉飾豁焉光霽凜焉繩尺振鐸郡庠製
錦巖邑教治湖蘇化行牟密烝獨是矜彊禦無惕平生
蘊蓄庶展什一既賦歸來公庭屏跡士庶碑傳大夫矜

式望踰於位祿斬於德不盡遺後天道非嗇壽登於耄
避囂還寂丹青如在儀刑千億

同邑單有學題

白巖任老夫子像贊

吁嗟我師不雕不琢渾金璞玉陋室一椽糞釜半菽竭
力事親臥冰哭竹恪恭厥兄推衣讓屋濟困扶危鄰親
宗族上傲王公下忤流俗無詐無虞還真守璞秉鐸嘉
庠桃李芳郁吁嗟我師文章冠世品行卓卓後學之範
士人之鵠

受業門人徐廷槐百拜題

西山之秀東海之英文章模楷孝友章程含芳挹質履
素懷清陶然自得泊焉無營如春風坐如玉山行允矣
君子展也大成生有功於文教沒永享夫榮名吾師乎
吾師乎憶追隨於兩載念陶淑於三生仰高山以至止
撫流水以移情雖老成之既謝而典型其永貞

受業姪元文頓首百拜敬題

任范已先生像贊

先生爲先叔祖階州公命蕭時所得士文章品詣夙推

雞壇祭酒余家大阮輩多與往還故得讀其詩文玩其楷法心儀神契者殆數十年癸卯冬予奉

命來紹郡訪之知已赴修文召矣令嗣驥占旋捧其遺像來謁披晤之下如覩丰神猶令人藹然以親肅然以

敬云

贊曰純夫伯恭氣和養充先生兼之冬旭春風鄴架曹倉奧窔必窮戢香遺文猶貯篋中嗚呼先生之德正直在胸先生之行蘊沒堪宗所耿耿者未盡罄余之鄙衷而徒緬然遐思仰矚白雲之起空

雍正甲辰仲秋同城姚鈐拜題

華峯任公像贊

昔賈誼為長沙王大傅有鵬鳥止於坐隅以為不祥且悼不壽迺作賦以自廣夫有賈生之才而不得參謀棘署贊道槐庭虛離謗缺費志歿地何所遇之奇若此嗚呼天實為之謂之何哉吾鄉任氏故稱望族類有達人而獨不能不有感於先生之長於才而短於遇也先生幼而聰穎甫就傅如成人從諸生為舉子業下筆千言而不屑於章句家貧不能購諸秘苑聞人有中經四部

藉閱之晝夜不釋其好學至矣而應童子試輒不利年二十七始補博學弟子員嗣是文日以高學日以富經藝外作爲歌詩古文語劇可傳尤工篆書力追秦漢人爭寶之大才固晚成縱橫海之巨鱗矯冲天之逸翮斯其選矣而三踏省門賣用不售乙亥六月竟以疾逝嗚呼何其奇也夫相如之上林子雲之甘泉皆受知於天子而賈生以妙才被謗爰傳鼻土匠已奇矣至於先生之英特秀發懷治安之策而未出衡門洞幽明之理而不登宣室有志未遂長懷無已不亦奇之又奇乎賈生云不以生故自寶兮養空而浮德人無累兮知命不憂然則有其才而無其遇者人乎天也何尤余與先生共桑梓出入相見交雖未深心竊嚮往辛巳冬其嗣以遺像來曰先君志也余媿無文聊述顛末以誌不遇之感若其居家之孝友涉世之端方則鄉之口可爲碑而家之乘自有傳余故無容多贅焉爰爲贊曰

不必富卷軸豐不必貴德行崇不必壽令名無窮清勁其格純白其衷亭亭鶴峙太華之峯

邑人吳斐頓首撰

雲標先生暨配王太宜人畫像贊并序

道光五年品南任君奉其先尊人 雲標先生畫像求

題 先生長子勵鋒 金釧 兄子 傑 之妻父也早世不及

見次即品南孝友誠篤侍奉其母 王太宜人備極色

養 太宜人今年七十有五少 先生八歲 先生卒

年三十七 太宜人守志得

旌如例謹為之贊曰

豐豐 先生長者家聲內行醇備秀質融明服賈孝養

制節謹度立業治生保世延祚強年不祿後世其昌積

善餘慶待荷

龍光

右雲標先生

維 太宜人三槐望族淑慎塞淵慈和端肅祥毓雙鳳
遽賦兩髦冰霜節苦綽楔

綸褒德厚福隆康強壽考子孝孫賢承歡忘老節孝之
後必有顯榮

鸞封疊錫千載傳聲

右王太宜人

誥授光祿大夫 經筵講官戶部右侍郎兼管錢法堂

事務加八級媼愚姪湯金釗拜題

柳塘任公像贊

幼孤而不墜其學無愧乎宋之歐陽奉母而母失其歡
何異乎晉之王祥撫弟而曲成其名有類乎漢之季長
以淑其躬以教於鄉茂芝蘭於培砌植桃李于門牆嗚
呼如公者達則邦之光不達則家之昌壽考而康強積
善而餘慶子子孫孫永無疆

賜進士出身 欽授內閣中書姻再姪韓欽頓首拜題

勵鋒先生暨高太孺人畫像贊

抑抑任君稟性端恪六歲而孤焚俾穉守節自誓母氏劬勞以養以教成立才高爰暨仲氏同心協力服賈孝養克供子職謹慎勤儉崇實黜浮交游落落寡悔寡尤長者愛慕幼者畏懼少年老成規行矩步仔肩家政盡瘁忘身年三十五遽辭世塵惟是藐孤年甫教讓不有嘉耦孰張而相維高夫人山陰望族守志堅貞持躬慎淑事姑盡孝撫子克嚴拚貧濟困積德以潛壽躋古稀康彊逢吉哲嗣采芹英年茂實積善餘慶方振鵬圖

龍綸

鳳誥何

天之衢

賜進士出身

誥授光祿大夫協辦大學士吏部尚書翰林院掌院學

士媼愚弟湯金釗拜題

杏陶任公暨配錢孺人像贊

猗與我公蕭山望族長者家風淳良世篤幼而孝弟長
不浮華言師慎訥行法柔嘉詩禮既通懋遷是服謹身
節用居德善俗謙謙君子溫溫恭人厚德載物積功累
仁年享艾耆豐盈犀角德充盈映善敦最樂辰彼碩女
武肅名門聽從姆教夙有旨聞來嫁于公所行維德宜
室宜家有典有則勤操井臼敬主蘋蘩雞鳴昧旦化始
福原婦順既修母儀聿茂鞠育劬勞教訓成就芝蘭玉
樹芬馥庭前慈雲壽曜備福登仙維湯與任葛蘿世締

若古朱陳姻好弗替公之仲女復儷我兄相夫教子克
繼家聲幸託葭葦獲親軌範緬想遺徽中心繾綣茲瞻
畫像恍接丰規贊揚萬一祇愧蕪詞

誥授光祿大夫戶部右侍郎兼管錢法堂事務加六級
隨帶加二級姻姪湯金釗頓首拜撰

品南二兄親家暨 德配任親母莫安人合像贊

慥慥君子古處是覆宅心孔厚制行以方克孝其親克
友其兄撫字猶子績學成名樂多賢友道誼胥匡耽幽
習靜菊秀蘭芳愛佳山水青烏術良年五十三惜命不
長嘉耦天合惟德之行孝慈勤儉好施爲常茹蔬廿載
頂禮空王壽六十六同歸僊鄉葭葦幸締耳熟能詳善
無不報必有餘慶子孫繩繩俾熾而昌

道光乙巳三月

誥授光祿大夫

經筵講官協辦大學士吏部尚書降補光祿寺卿
恩賞二品頂帶休姪媼愚弟湯金釗拜題

住老親母王太孺人像贊

猗歟任母勤儉持家相夫有道德性靜嘉隨任閩嶠佐
理無差何期夫子疢疾交加魂歸碧落抱恨靡涯翩翩
素旄目眩塵沙迢遙旋里歲月彌賒別十三載治絲績
麻不辭勞悴不樂繁華遽爾嬰疾爰駕雲車年五十一
懺危龍蛇令子哀慕晨夕咨嗟爰寫遺照供養煙霞春
暉欲報滿眼飛花碧桃掩映綠柳周遮泉清澗澗石古
峪呀對此圖象仙源是誇愧予樗質誼託蒹葭援筆作
贊詰屈聳牙

青山任氏家藏 卷七
姻侍生蔡名衡拜撰并書

書任叔連遺墨後

此叔連君遺墨也幼時聞叔連名以生晚不及陪几席
言笑聞其書法最精亦不及見康熙癸丑予還舊廬其
猶子青巖君拾其遺墨數番則平時所書南華兩篇及
試界一歌皆取閩中竹楮任意抄錄書法清真具有氣
韻而藏穎身中運神象表似乎做元常而進王氏者真
楷書之雄矣昔人評字學謂金注不如瓦注散手振刷
矜卓都盡故偶然標寫生平蘊奧藉之流形意不在書
也顧青巖謂予云南華本全抄遺軼流散僅得是番則

其勤緝于書法又若此唐武后向王方慶家索王氏遺蹟方慶以九代三從伯祖諸書紙進之青巖可以觀矣

西河毛姓記

任待菴璇璣圖跋

原本作韓燦以公係此各領鄉薦

璇璣規運也方則扞矣自蘇蕙以錦方行世而五代迄今僅有偽為規圖以為西來所傳者燦復多其字數極盡其致然則燦其繼蕙而與者與蕙錦若干字得詩若干首以有扞未盡讀也燦圖若干字詩若干首讀而盡之其字數繁簡讀句通塞則規簡矩繁規通矩塞理固然者予嘗謂蕙不遇滔其遇滔也亦無不得志于滔則不能有斯錦向使燦不遭誣押雖鬼神實好事亦不能藉燦有斯圖矣

西河毛奇齡撰

任王備詩集跋

王備有三絕詩一書一其一則錢摩之技也能扼三寸

鐵畫石作八體書勢精良而結捷雖李程以下莫過焉

然而王備往匿其所能自甲申後間示書法莫見其所

爲詩者而至于錢摩之技則折鐵詘指而闕不傳予從

臨川還王備忽貽詩屬序予得之喜曰此又一絕乎及

予緡較則見有所爲漫憶者出游詩也其詩多得之荆

山笠澤之間以憶而得之故名憶有所爲愁吟者東園

詩也王備居東園幽愁憂思積晨夕所感而鬱爲吟則

蕭山仁氏家苑 卷七
名愁嗟今而後吾始知王備之不欲見其絕有以也予
出游無詩暨還舊廬其愁有過于王備者王備東園在
郭東去予廬百步爾其半在野垣之隕于耕者久矣中
有陂塘襍花覆楹間予倘久處此當日從咏嗟其中王
備肯盡示其技乎吾將買一石使書是文鏤之摩之以
與是詩而三焉

西河毛奇齡撰

前賢題跋附編

跋劉伯溫先生手帖後

右二帖皆劉伯溫先生手書也至正癸巳江浙行省左
丞鐵里帖木爾統諸軍捕寇海上先生以江浙儒學副
提舉應其辟爲其行軍參謀既而左丞喪師被譴先生
亦自投劾而去奉太夫人僑於越扁舟往來鑑湖湘湖
之間而先生之於元禮也自爲提學時交遊矣至是加
親密焉前一帖莫詳遣之歲月元禮言乃衡先君左司
尹蕭山之日先生來相訪其還越也遣此當是乙未夏

也然不可考已後一帖戊戌春所遣無疑蓋丙申春達
識鐵木爾來爲丞相江浙時括屬縣六寇居其五故沿
海檄萬戶石末宜孫以浙東副元帥領郡兵討之弗克
丞相到省卽起先生與先左司俱往諭以文告之命而
至括以其夏寇雖降而復反側且二歲迄不能底定戊
戌春乃縱軍草薙之其夏青田寇吳成七松陽寇宋龍
九遂昌寇潘賢三縉雲寇杜仲光悉伏誅他若吳英七
周天覺等爭相率詣軍門欵服而括遂平矣今帖首言
奉別兩載而中有山寇漸就誅夷之語以此遣於其春

也是冬上親征婺十一月婺守將甯安慶舉城降尋移
兵臨括先生去之青田山中王師入括則己亥十一月
也明年春徵先生與胡深章溢葉琛詣南京越國胡公
乃戒裨將繆美以先生四人入覲上一見先生語合意
畱居帷幄日見信任與聞大計乙巳夏拜太史命上登
極拜翰林學士遷御史中丞兼太子贊善大夫復入宏
文館爲學士及論功行賞封誠意伯於戲至正之末郡
縣間盜賊軍旅之事如彼先生名進士素負材畧而見
用僅如此欲無危亡得乎今天子識先生於膚敏之中

倚以爲謀臣而先生乃得効其奇謀秘計以弼成鴻業
遂與開國元勳比烈焉此與伊伊之用不用而夏以亡
殷以興奚異哉

洪武甲子閏十月二十日前史官眉山蘇伯衡跋

跋王子充先生手札後

文節公以雄豪俊邁之學鼓舞一世卒以王事歿於南
邦寥寥大節千載一人也今觀此帖雖莫詳遣之歲月
官之姓氏然交際之道拳拳於任氏昆季者可謂至矣
任氏子孫烏可不珍藏寶襲爲事哉

永樂丙戌夏六月二十五日郡人鄧經識

跋任氏家藏名公書札

吾邑任氏詩禮望族也當全盛之時名公鉅卿踵接於門若前太史中丞劉公伯溫待制王公子充編修伯衡蘇公洎則誠高先生皆一代之豪傑觀其卷中書札拳拳於任氏者可謂至矣然非任氏先世之高風雅望又曷能致此哉爲子孫者豈可不寶惜而珍藏之時

洪熙乙巳秋七月既望賜進士出身文林郎監察御史同里何善識

題劉伯溫先生手帖後

片言隻字畱傳爲世寶惜者必其人若泰山黃河垂業
與日星爭輝者惟能然重不在彼而在此也嘗讀郁離
子每嘆元不能用賢底於滅亡而劉公卒以所負輔真
主以成佐命之功雖或天意有以俾之求諸離黍亦莫
非不幸也歟此二帖任氏子孫宜什襲珍藏之
永樂乙酉秋八月二十有三日里人張經題

跋任氏交游文翰卷後

碩在至正戊子己丑庚寅之歲師伯舅瓊臺陶先生讀
書錢塘時永嘉高先生則誠以處州路錄事辟掾江浙
行省括蒼劉先生伯溫副提舉江浙儒學皆與伯舅爲
至交金華王先生子充自京師黃學士先生講下卒業
而還與伯舅有莫逆之契論文每至夜分屢數日而別
庚寅之冬伯舅赴廣信永豐文學任而高劉二先生亦
皆秩滿散去逮我聖朝革元命劉先生仗劍西歸侍皇
上親征叅謀軍事功在元勲之列伯舅於洪武己酉被

蕭山仁氏家苑卷七
名預修元史時王先生由漳州府通判擢翰林待制偕
侍講學士潛溪宋先生爲總裁史成伯舅除任應奉翰
林文字尋起禮部尚書劉先生歷御史中丞宏文館學
士封誠意伯致仕家居亦時往還京師眉山蘇先生平
仲由國子學正陞翰林國史院編修官碩亦以匪材忝
任吏部主事王先生以修順帝史稽遲左遷翰林編修
碩居銓選得與王先生考驗教官時相與處及王先生
使雲南碩亦出令平陽之石樓伯舅拜叅政湖廣行省
皆不復聚首矣播遷存歿之間俯仰踰一世永樂庚寅

碩以衰暮之年偶來蕭山會任君元庸出所藏劉先生
怡怡山堂記蘇先生所撰先長者墓誌王先生蕭然山
堂記高劉二先生寄伯大元禮父子各二帖王先生寄
郎中君拱一帖皆致意於伯大父子昆弟者也君拱姓
余氏永豐人伯舅弟子爲江浙行省左右司郎中卷後
有國子助教張孔升先生所撰先耆士伯大墓銘任氏
家譜圖序時思菴記則近歲所作王先生之令子國學
博士紳有通元禮一書叙世好也碩伏讀之次慨念諸
先生皆嘗親炙而不可復見其於渭陽之感有不能自

已者任氏詩書之澤久而弗替所以光昭前烈者不在彼而在此真知務哉嗚呼前輩之嘉言善行孝子順孫之所以善繼善述與夫朋友交遊之義盡在於此觀是卷而其類不泚然知愧者豈人賢子孫哉王先生以死事諡文節伯舅諱凱字中立學者稱瓊臺先生終晉府右相卒於官元庸則元禮之季弟以文行世其家因併及之

永樂八年春正月既望樂安晚生顧碩謹識

其二

右任氏先友手墨一卷其間書序銘記著述姓名悉詳於景蕃之筆其劉公所作怡怡山堂記則燬於元之庚子後得之覆瓿集續於明之庚寅余生也後不獲履於伯大翁昆仲之間以挹餘輝為慊伏睹其子之友之文則信知其為人矣而吾原庸拳拳不忘先世之美復搆成軸蓋將深有望於其後也為之子孫者可不是效是則於以保之乎時

永樂壬辰十月望日房山後人高震書

其三

右自太史眉山蘇先生乎仲所撰任長者墓誌而下其
間槩若王太史禕蕭然山堂記誠意伯劉公伯溫永嘉
則誠高先生書國子助教橘樂張先生銘耆士任公墓
時思菴記天台顧吏部房山高教授跋蓬軒任先生詩
凡二十有七通是皆當代名公碩彥爲吾邑任氏父子
兄弟間作也讀之者有不惟企其人之不多可復作而
且重其翰墨亦不易於多見也已於戲余生也晚今幸
得捃其遺芳於故家什襲珍藏附於家乘之末則其爲
快也不既多矣乎覽畢姑書此以歸之且識余之景仰

云

永樂乙未冬十一月初吉同邑魏驥謹識

其四

詩書翰墨美事也富而不好者有矣貴而不重者有矣
富而好貴而重非知之深信之篤莫能然也吾邑任氏
世爲詩禮望族當全盛之時名卿鉅公接迹於門若中
丞劉公待制王公編修蘇公則誠高先生皆一時聞望
之士往來吳越嘗館穀其家父交子往代不乏人鄉邦
榮之諸公往復之書題跋之言片紙隻字養晦貞素二

先生咸器而珍藏之迨吾彥公彥法又善繼述伯大之志裝潢成卷張大其言可謂克肖前烈而不替乎家聲也已至若任氏一門之盛祖父之賢已見於諸公之翰墨茲不復贅

永樂十七年秋九月重陽日賜進士中順大夫交趾按察副使同里殷旦跋

其五

右諸大老文章板行於世者幾半任氏先德自足以託之不朽矣賢子孫復能珍藏墨蹟又足徵文獻之久而彌盛也交孫彥法與予交舊不相見者二十年茲復盍簪出此卷示余謹識其後而歸之時

宣德初元正月廿四日翰林修撰諸暨王鈺書

洪熙元年冬十一月十有五日長山後學俞廷輔拜觀
其六

偶少時聞長者談誠意伯劉公勲名殆非今之人所可及繼得所著郁離子及翊運錄等書觀之然後知公勲業之有自也則誠高先生待制王先生編修蘇先生皆一時儒選文與劉公相馳驅間得見其著作竊嘆不能

親炙其人快平生之景慕也解官閑居忽蕭山韓氏
 持其親友任器之先世所藏高劉王蘇諸先生馳問親
 筆書翰及銘記之作裝潢成卷踵門求言噫以憫夙慕
 之懷今幸得拜觀諸先生手筆若是者豈能多哉玩閱
 累日不能去手諸先生與人交際之誠辭翰筆札之令
 當時任氏門庭賓客之盛藹然燦然於目曉間矣雖然
 世固有子受父詔問之不能舉其辭者自任氏先世至
 今越百餘年子孫世克寶蓄此卷如一日則其先世親
 賢友仁薰陶之助不於是而益驗乎今器之又兼業詩

書而隆孝思故家文獻之徵引而弗替又是卷無窮之
 幸也

天順元年歲舍丁丑九月下浣致事汀洲府知府諸暨
 俞偲識

其七

余友任器之以先世所遺手卷見示悉皆當代名公鉅
 儒後先相繼所作之翰墨也展玩累日不能釋手嗚呼
 諸公之德業文章天下之人仰之若泰山北斗雖片紙
 隻字獲之者如寶拱璧矧得其文辭之全篇者乎器之

青山任氏家刻卷七
珍重藏之以遺後昆俾讀是卷者知世代繼述之美家
聲之舊永久而不磨云

天順八年秋七月朔旦同里倪敏識

跋王子充先生撰任氏蕭然山堂記後

今年秋元禮來南京視中丞劉先生待制王先生而余
備嘗成均因獲相見計爲別已十有五載追數當時會
合之人盡矣而獨余三人者在慨嘆久之語次及山堂
乃始知已燬於庚子之兵而二先生記文亦不能獨存
重有感焉劉中丞文藁莫之存而王待制固存稿也朝
廷責成元史甚切而王待制總裁朝夕不遑暇欲重書
遺元禮不果山堂雖不存而元禮兄弟奉親讀書則猶
曩時亦可喜已余故爲書之云

洪武己酉九月既望眉山蘇伯衡記

跋任氏交游墨蹟卷後

觀卷中諸賢製作知任氏先世盡友海內有德言之士見此卷聯聚列在任氏上世遺文後又知任之有賢後也昔韓柳遺文得歐陽公而始傳世邵子皇極經世書得後昆伯溫註而益明今諸賢雜著得任君器之而有傳有歐陽之功以先世交遊墨蹟尚聯聚不置則祖父遺文任君甯無伯溫之心哉噫歐陽之先未見有祖父伯溫之世未見聚交遊墨跡茲任君兼有之不賢而能之乎繼自今任之後以今心爲心而師上世之賢則家

蕭山任氏家苑卷七
聲之振文獻之盛吾蕭山以任史比王謝之稱如瓜瓞
之綿綿如火始然而泉始達如卉木春甲如河濟江漢
之源源混混常出而不竭矣庸書厥盛庶凡爲世家後
昆者知興起云

天順八年秋仲朔日前學正同里張輅題

其二

予邑隱君子任器之以同里葭州學正張先生爲其跋
先世交游墨跡俾予書之於卷予觀卷之所作所書盡
名公鉅卿碩儒其人其文皆世不多見多得者學正之

跋固足稱之予之書奚足稱學正之跋哉雖然予幸獲
生同里於學正爲後進敢不爲之執筆書既器之亦欲
予言因不敢辭而識之以此云歲月後跋之廿日也何
舜賓拜手謹書

其三

鄉先生任君器之以是卷投完焚香拜觀皆當代顯晦
名公爲厥祖厥考詞翰也其間第六段八段九段實先
子文靖府君在永樂四年所書屈指七十餘年楮墨如
新又至三十一段景泰七年命不孝完代書者完莊誦

未及終篇不勝感愴痛先逝之既遠楮墨留人間若先
生寶如拱璧者不知其幾何耶完爲之子弗能佩服
先訓日流汗下九原靡安心矣不孝之罪大矣哉於此
深有愧焉且覩茲手澤情傷神亂奚暇他及故於諸賢
嗣翰不敢細書惟丐先生後之子子孫孫其嗣寶之其
嗣寶之謹識用歸諸先生插架云魏完載拜

任氏家藏劉誠意札記卷子書後

予從濬生孝廉觀其所藏先人元禮公與故明劉誠意
往來寓復并誠意投贈卷子深嘆元禮公以處士被元
明諸路辟召掉臂不出矯然超于物乃獨偕天下豪俊
一時應運從龍之彥周旋起居意氣縝密此其聲實必
有大超于倫類在也抑又嘆前人所貽後人守之爲不
易而是家獨完葆之甚善迄觀青巖所藏卷則益驗元
禮公之賢與後人之能世守均可念矣卷列青田札記
及學士蘇伯衡助教張經諸跋按其語微與史忤似青

田當至正癸巳本以行軍叅謀應江浙行省左丞鐵里帖木爾之辟征海喪師遂自投劾奉其太夫人避越至元禮廬是札其既去之謝也又一札有奉別兩載山寇漸平諸語則又在至正丙申青田復受江浙丞相達識鐵木爾之聘諭其鄉青田遂昌縉雲諸寇遲久未效而是年樞密諸使將加之兵故云云則意古來命世者當未遇時其初無一定而與物浮沈若此況乎以庸才而當季世之艱難者乎然則時未可爲而責處者以有爲不可也聞任氏尚藏山堂記稿今青田集所載蕭山任

氏山堂記是也又有送元禮東歸序稿似從龍後招元禮京師將勸之仕而元禮復掉臂歸其卷有高啓王禕諸公送詩予鄉時曾見之至乎畫長江風雨圖題其端以贈元禮則予未見也名家卷軸守有三難兵革燥濕攬撫不預一友朋愛好傳觀漫漶二彼我分拆漸至零落三以前二難則任氏所知也至于三難則一家數藏恐或不免爲語孝廉其亦合併而傳于勿替可矣

同里後學毛牲謹記

重書怡怡山堂記跋

建齋任君書來言先長者公怡怡山堂燬於至正庚子
之兵劉文成公記文碑刻亦無存焉請重書壽諸石於
戲此念祖之孝思也書雖劣曷敢辭咸豐四年甲寅閏
七月後學湯金釗謹書

吾始交蕭山任子涓長繼而得交其大阮建齋先生二
君蓋皆有才偶出其一技皆足以了海內千百輩吾恆
歎任氏之多賢謂非其祖愿之盛不可也今年九月自
京口軍中來越展先人墓歸途宿涓長草堂與賢竹林

樂共晨夕建齋先生出湯相國所書怡怡山堂記讀之
夫然後知任氏之多賢實有由來而吾夙昔謂其祖
之盛正復不謬耳欣然記此時咸豐丁巳九日秀水周

閑秉燭書

